

Forskrift om vass- og avløpsgebyr, Bygland kommune

Heimel: Vedteke av Bygland kommunestyre dd.mm.25 med heimel i lov 16. mars 2012 nr. 12 om kommunale vass- og avløpsanlegg §§3 og 5 og forskrift 1. juni 2004 nr. 931 om avgrensing av forureining § 16-1 annet ledd.

Kapittel 1. Generelle føresegner

§ 1-1.Føremålet med forskrifta

Forskrifta fastset utrekningsmåte og gebyrplikt for kommunen sine vass- og avløpstenester.

§ 1-2.Definisjonar

I denne forskrifta meinast med:

- a. *Eigedom*: Fast eigedom registrert med eige gards- og bruksnummer, eige festenummer eller eige seksjonsnummer i matrikkelen. Seksjon etablert i høve til lovgivinga om eigarseksjonar vert rekna som sjølvstendig eigedom.
- b. *Abonnent*: Eigar eller festar av eigedom som er tilknytt kommunen sitt vass- og/eller avløpsanlegg, eller som er godkjend eller kravd tilknytt. Festar av eigedom skal stå som abonnent når gjenståande festetid da gebyrplikta oppstod var 30 år eller meir, eller festar har rett til å få festeavtalen forlenga slik at samla festetid frå gebyrplikta oppstod vil kunne bli 30 år eller meir. I burettslag er burettslaget abonnent. I eigarseksjonssameige er kvar eigarseksjon ein abonnent.
- c. *Abonnement*: Avtale mellom abonnent og kommunen om vass- og avløpstenester gjennom tilknyting av sanitærinstallasjonar og private vass- og avløpsanlegg til kommunen sine vass- og avløpsanlegg. Det er ikkje ein føresetnad at avtalen er skriftleg. Avtale om tilknyting via privat fellesleidning vert rekna som abonnement.
- d. *Sanitærinstallasjonar*: Abonnenteigde røyr, installasjonar og utstyr innanfor husets yttervegg, som er tilknytt vass- og/eller avløpsanlegg.
- e. *Privat vass- og avløpsanlegg*: Abonnenteigde private leidningar (stikkleidningar) og utstyr utanfor husets yttervegg, som er tilknytt offentleg vass- og/eller avløpsanlegg.
- f. *Avløpsvatn*: Både sanitært og industrielt spillvatn og overvatn.
- g. *Bygg/bygning*: Konstruksjon/byggverk med eige bygningsnummer i matrikkelen.

- h. *Brukseining*: Bygning eller del av bygning (lokale), til dømes bustad, kontor, verkstad og lager.
- i. *Bueining*: Brukseining som er definert som bustad eller bueining i matrikkelen. Som bueining reknast kvar og ei brukseining som har minst eitt rom og eigen inngang, og der ein har tilgjenge til vatn og toalett utan å gå gjennom anna brukseining.
 - 1. *Utleigerom i ein privat bustad*: Det som på folkemunne ofte blir omtala som hybel eller utleigerom reknast ikkje som sjølvstendig bustad, sidan ein må gå gjennom andre sin bustad for å komme til eige rom.
 - 2. *Hyblar i hybelbygg*: Kvar hybel reknast som sjølvstendig bustad, sjølv om bebuarane deler viktige funksjonar som kjøkken og/eller bad. Kjøkken, bad og gang som deles av fleire bebuarar reknast som fellesareal og ikkje sin eigen del av andre sin bustad.
- j. *Bustadeigedom*: Eigedom med bygg som vert brukt til bustadføremål, medrekna fritidsbustad. Bygningstype 111-163 etter [NS-3457](#).
 - 1. *Fritidseigedom*: Eigedom der alle bustadbygg er registrert som fritidsbustad i matrikkelen.
 - 2. *Fritidsbustad*: Registrert i matrikkelen med bygningstype 161-163 etter [NS-3457](#).
- k. *Kombinasjonseigedom*: Eigedom med ei eller fleire bueiningar, i tillegg til ei eller fleire brukseiningar som ikkje er bustad. Eigedom med ei eller fleire bueiningar i tillegg til ei eller fleire bygningar for fiskeri eller landbruk vert klassifisert som kombinasjonseigedom.
- l. *Næringseigedom*: Eigedom som ikkje er bustad, fritidsbustad eller kombinasjonsbygg. Bygg for offentlege føremål vert klassifisert som næringsbygg.
- m. *Bruksareal (BRA)*: Bruksareal for eigedom som er registrert i matrikkelen og rekna med utgangspunkt i [NS-3940](#).

§ 1-3. Generell gebyrplikt

Plikta til å betale vass- og/eller avløpsgebyr gjeld følgjande abonnentar:

- a. Fast eigedom som er tilknytt kommunal vass- og/eller avløpsleidning, direkte eller gjennom privat samleleidning.
- b. Eigedom som kommunen i medhald av [plan- og bygningsloven § 27-1](#) eller [§ 27-2](#) har kravd tilknytt kommunal vass- og/eller avløpsleidning.

§ 1-4. Gebyrtypar

Gebyrtypane er:

- a. Eingongsgebyr for tilknytning til høvesvis vatn og avløp.
- b. Abonnementsgebyr (fast del) for høvesvis vatn og avløp.
- c. Forbruksgebyr (variabel del) for høvesvis vatn og avløp.

I tillegg kan kommunen krevje betaling etter standardiserte satsar for kommunen sine kostnader ved avlesing av vassmålar, samt avstenging og påsetting av vassforsyning.

§ 1-5. Gebyrsatsar

Gebyrsatsane vert årleg vedteke av kommunestyret, og trer i kraft frå det tidspunktet kommunestyret avgjer. Det er ikkje gjort vedtak om sjølvkost på tenestene regulert av denne forskrifta. Det er kommunestyret som må vedta dette.

Gebyrsatsane kjem fram av gebyrregulativet, og er tilgjengelege på kommunen sine heimesider.

§ 1-6. Arealberekningemetode

Dersom utrekninga av gebyr vert gjort avhengig av bustaden sin storleik, skal det vere bruksarealet rekna etter [NS-3940](#) som dannar grunnlaget for gebyrfastsetjinga.

Garasjar, uthus, anneks, utvendige buer og naust vert ikkje medrekna som bruksareal for bustad- og kombinasjonseigedom. Bygningstype 181-183 etter [NS-3457](#).

I tilfelle der eigedomen sine opplysningar i matrikkelen er mangelfulle, kan kommunen estimere arealet basert på omriss av bygninga(ne) i offentleg kartverk eller tilgjengeleg skattetakst (eigedomsskatt). Abonnenten kan sjølv skaffe dokumentasjon på eigedomen sitt gebyrpliktige areal.

Som grunnlag for utrekning av gebyr tar kommunen utgangspunkt i opplysningane i matrikkelen. Opplysningar skal korrigerast dersom dei er feilaktige.

Kapittel 2. Tilknytingsgebyr (påkoplingsgebyr)

§ 2-1. Gebyrplikt

Gebyr for tilknytning til kommunalt vass- og/eller avløpsanlegg skal betalast for:

- a. Tilknytning av eigedom.

- b. Tilknyting av eigedom som kommunen krev tilknytt.
- c. Eigedom med tilknyting som ikkje er godkjent.

Tilknytingsgebyr for tilknyting til vatn og/eller avløp skal ikkje betalast for:

- a. Seksjonering av allereie tilknytt eigedom utan at bruksarealet for eigedomen endrast.
- b. Bygg som har mellombels tilknyting i opptil eitt år, til dømes brakkerigg. Dersom tilknytinga varer i meir enn eitt år, skal det verte kravd tilknytingsgebyr.
- c. Tiltak som utvidar eigedomens sitt gebyrpliktige bruksareal etter [§ 1-6](#).
- d. Særskild tilknyting av sprinklaranlegg.

§ 2-2. Utforming av gebyra

Tilknytingsgebyret er eit eingongsgebyr og vert betalt etter fastsett sum i gebyrregulativet.

Om kommunen overtek private vatn- og/eller avløpsanlegg kan kommunestyret i kvart enkelt tilfelle avgjere om det skal reknast eingongsgebyr for tilknyting, og eventuell rabatt.

Eingongsgebyret for tilknyting skal utgjere eit fast beløp per eigedom.

§ 2-3. Ansvar og betaling

Den som er abonnent på det tidspunktet gebyrplikta oppstår, er ansvarleg for betaling av gebyret.

Gebyret vert fakturert etter gjeldande sats når igangsetjingsløyvet vert gjeve. For eksisterande bygg med tilknyting som ikkje er godkjend, vert tilknytingsgebyr betalt etter gjeldande sats på det tidspunktet kravet vert framsett eller foreldingsfristen sitt utgangspunkt, jamfør [foreldelsesloven § 3](#).

Tilknytingsgebyr skal vere betalt før tilknyting.

Kapittel 3. Årsgebyr

§ 3-1. Gebyrplikt

Årsgebyr skal betalast for alle eigedomar som:

- a. er tilknytt kommunalt vass- eller avløpsanlegg, eller
- b. er gebyrpliktig etter [§ 1-3](#), første ledd, bokstav b.

Årsgebyr reknast frå den tidlegaste av dato for mellombels bruksløyve eller dato da eigedomen blei tatt i bruk i tilfelle der mellombels bruksløyve ikkje er gitt. For mellombels tilknytingar blir årsgebyr rekna frå dato for tilknyting til dato når tilknytingen blir avslutta.

Gebyrplikta er uavhengig av om det er utandørs tappepunkt/vasspost eller om det er innlagt vatn.

§ 3-2. Gebyret sin oppbygning

Årsgebyra for vass- og avløpstenester er samansett av to delar:

- a. Abonnementsgebyr (fast del).
- b. Forbruksgebyr (variabel del).

Inntektene frå abonnementsgebyret skal fortrinnsvis dekkje vass- og avløpstenesta sine forventa kapitalkostnader.

Kor stor del av årsgebyret som skal vere fast og variabel del, vert kvart år fastsett i gebyrregulativet.

§ 3-3. Abonnementsgebyr

Bustad- og fritidseigedom skal betale abonnementsgebyr per bueining.

Eigarseksjonssameige med felles vassmålar i bygning kor det både er bueiningar og brukseiningar med næringsverksemd skal betale abonnementsgebyr per brukseining.

§ 3-4. Forbruksgebyr

Abonnentane skal betale forbruksgebyr etter målt eller stipulert vassforbruk i m³. Både kommunen og abonnenten kan krevje at forbruksgebyret vert fastsett ut frå målt forbruk etter [§ 16-2 i forurensningsforskriften](#). Dersom forbruksgebyret allereie er fastsett ut frå målt forbruk kan dette ikkje reverserast slik at forbruket blir rekna ut etter stipulert vassforbruk.

Det vert ikkje gjeve nedsett forbruksgebyr for storforbrukarar av vatn.

Som hovudregel gjeld at avløpsmengda vert rekna lik vassmengda ved utrekning av forbruksgebyr. Unntak frå dette er nemnt i [§ 3-7](#), femte ledd.

§ 3-5. *Betaling etter målt forbruk*

Forbruksgebyr skal betalast for rapportert årsforbruk. Følgande eigedomar skal betale etter målt forbruk og ha vassmålar installert:

- a. Næringseigedom, medrekna bygg for offentlege føremål.
- b. Kombinasjonseigedom, medrekna eigedomar med ei eller fleire bueiningar i tillegg til ei eller fleire bygningar for fiskeri eller landbruk.
- c. Anlegg med varig eller mellombels tilknytning i samband med oppføring av bygg eller anlegg. Dette gjeld også for anlegg på ein ikkje utbygd eigedom som kunne vore kravd tilknytt etter [plan- og bygningsloven § 27-1](#) eller [§ 27-2](#) dersom den hadde vore utbygd.
- d. Bustad- og fritidsbustadeigedomar oppført etter denne forskrifta har trått i kraft. Kommunen kan krevje at det installerast ein vassmålar per bueining i seksjonerte eigedomar. Kommunen kan og krevje at det installerast vassmålar på eigedomar med svømmebasseng som er søknadspliktig etter [plan- og bygningsloven](#).

Dersom det ikkje er mogleg å installere vassmålar kan kommunen fastsetje eit stipulert forbruk.

For mellombelse tilknytningar kan kravet om vassmålar fråvikast dersom vassmengda kan verte fastsett på andre måtar.

Dersom bygning med installert vassmålar skal rivast, pliktar abonnenten å lese av målarstanden og sende resultatet til kommunen tidlegast to veker før riving blir sette i verk.

§ 3-6. *Betaling etter stipulert forbruk*

Eigedom som ikkje har vassmålar, skal betale forbruksgebyr etter stipulert forbruk. Stipulert forbruk reknast ut frå eigedomen sitt bruksareal multiplisert med ein faktor for vassforbruk per kvadratmeter bruksareal. Faktoren kjem fram av gebyrregulativet.

For fritidsbustad skal faktoren for vassforbruk vere den same som faktoren for bustadeigedom.

Frittliggjande garasjar, uthus, anneks, utvendige buer og naust vert ikkje rekna som bruksareal for bustad- og kombinasjonseigedom.

For svømmebasseng på eigedom som ikkje betalar etter målt forbruk, skal det betalast ei tilleggssavgift for vatn og/eller kloakk tilsvarande eit årleg vassforbruk på:

- a. 40 m³ for bassengvolum inntil 20 m³

- b. 80 m³ for bassengvolum inntil 40 m³
- c. 120 m³ for bassengvolum over 40 m³

Desse føresegnene gjeld per svømmebasseng som er søknadspliktig etter [plan- og bygningsloven](#).

Kommunen kan kontrollere eller krevje dokumentasjon på bassengvolum ved behov.

§ 3-7.Reduksjon av eller tillegg til årsgebyr

Restriksjonar på vassforbruket, avbrot i vassleveransen eller i mottak av avløpsvatn gjev ikkje grunnlag for reduksjon av gebyra.

Fråflytting eller fråvære gjev ikkje grunnlag for reduksjon av gebyra. Er bustad/bygg på eigedomen fjerna, eller øydelagd slik at den ikkje kan verte brukt, betalast årsgebyr inntil stikkleidning er fråkopla (plugga/plombert) ved hovudleidninga.

Ved søknad til kommunen kan abonnenten få fritak for årsgebyret når eigedomen fysisk vert fråkopla kommunalt leidningsnett. Abonnementet tek slutt når melding om plombering er motteke.

Ny tilknyting av eigedomen utløyer ikkje ny betaling av eingongsgebyr for tilknyting. Både arbeidet med å kople frå og ny tilknyting vert utført for abonnenten sin kostnad og etter kommunen si tilvising. Om kommunen utførar stenging eller påsetjing av vassforsyninga skal det betalast eit gebyr for dette. Gebyret kjem fram av gebyrregulativet.

For eigedom som ikkje vert brukt som bustad, og der avløpsmengda er vesentleg større eller mindre enn vassforbruket, kan avløpsgebyret verte rekna ut frå målt avløpsmengd, eller verte fastsett etter særskild avtale med kommunen.

For eigedom der avløpsvatnet si samansetjing avvik frå vanleg hushaldsavløp og verkar fordyrande på drift og vedlikehald av kommunen sitt avløpsanlegg, kan kommunen fastsetje eit tillegg til avløpsgebyret til dekning av meirkostnadane. I slike tilfelle vert det inngått ein separat avtale mellom kommunen og abonnenten.

§ 3-8.Gebyrreduksjon i medhald av forbrukerkjøpsloven sine reglar om prisavslag

Abonnenten har i visse tilfelle rett til reduksjon i gebyr (prisavslag) ved feil eller mangel ved vassforsyninga i medhald av [forbrukerkjøpsloven](#) sine reglar om prisavslag.

Vilkår for gebyrreduksjon er at mangelen er skulda forhold på kommunen si side, til dømes forureining i vassskjelde eller feil ved kommunalt anlegg. Kommunen pliktar å bidra til å avklare ansvarsforholdet.

Generell tilråding om kokning som tryggleikstiltak etter trykkfall som følgje av reparasjon, spyling, brannsløkking mv., gjev ikkje gebyrreduksjon.

Krav om redusert gebyr må verte fremja innan to månader etter at forholdet oppstod, dersom ikkje kommunen har fatta eige vedtak om gebyrreduksjon.

§ 3-9. Pålegg om utbetring

Kommunen kan krevje dekt alle kostnadar direkte knytt til tiltak som følgje av at abonnent har unnlate å etterkome pålegg om å utbetre lekkasjar på eigedommen si vassleidning eller manglar ved avløpsanlegg eller sanitærutstyr. Ved omlegging eller utbetring av avløpsleidningar kan kommunen krevje at eigar av tilknytt stikkleidning set i verk tilsvarande omlegging eller utbetring.

Gebyrpliktig som unnlèt å etterkome pålegg om utbetring av lekkasjar som medfører forureining kan verte kravd tvangsmulkt etter [forurensningsloven § 73](#).

§ 3-10. Ansvar for opplysingar om abonnement

Abbonnten skal melde frå til kommunen om endringar i abonnementsforholdet.

§ 3-11. Ansvar for gebyra

Abbonnten har ansvar for betaling av årsgebyret, uansett om gebyrkravet er retta mot abonnenten eller annan rekningsmottakar.

Abbonntar som samarbeider om felles vass- eller avløpsmålar, er solidarisk ansvarlege for gebyra. Gjeld slikt samarbeid eit sameige etter [eierseksjonsloven](#), er kvar abonnent ansvarleg for ein del av gebyret i samsvar med sin eigarpart, dersom ikkje anna fordeling er fastsett i sameiget sine vedtekter eller bindande vedtak i sameiget.

§ 3-12. Retting av feil gebyrberekning

Har mangelfulle eller feil opplysingar ført til feilaktig utrekning av gebyr, skal utrekninga rettast og differansen verte gjort opp. Krav som er forelda etter reglane om forelding av fordringar, vert normalt ikkje dekt.

Kapittel 4. Føresegner for installasjon og bruk av vassmålar

§ 4-1. Målartypar

Føresegnene for vassmålalar gjeld tilsvarande for eventuelle avløpsmålalar. Føresegnene gjeld for vass- og avløpsmålalar med fjernavlesing så langt dei passar.

§ 4-2. *Installasjon*

Kommunen avgjer kor mange vassmålalar den einskilte eigedom skal ha, og dessutan type, storleik og plassering på vassmålaren.

Kommunen skal godkjenne den som skal stå for installasjon og vedlikehald, og dessutan eventuell flytting, utskifting eller fjerning av målaren.

Dersom eksisterande eigedom med vassmål vert oppdelt i nye eigedomar, skal kvar av de nye eigedomane ha eigen vassmål.

Abonnentar kan samarbeide om felles vassmål der det vil vere særleg kostbart å installere eigen mål for kvar eining. Årsgebyr vert fordelt på abonnentane etter reglane i [§ 3-11](#), andre ledd.

Alle nybygg skal installere vassmål.

Pålagt vassmål for ny eigedom skal vere installert seinast når det vert gjeve mellombels bruksløyve eller eigedomen vert teke i bruk, og for eksisterande eigedom når den vert tilknytt. Dersom dette vert unnlåte, skal abonnenten betale stipulert årsgebyr etter [§ 3-6](#).

For installasjon og bruk av vassmål gjeld elles kommunen sine tekniske føresegner.

§ 4-3. *Eigarforhold og kostnader*

Ved installasjon av ny vassmål skal kommunen stå som eigar av denne. Installasjonskostnader (inkl. sjølve vassmålaren) vert dekt av abonnenten. For å dekkje kommunen sine kostnader til vedlikehald, kontroll og utskifting av vassmålaren vert det betalt ei årleg leige. Kommunen tek kostnaden ved utskifting ved normal slitasje. Abonnenten betaler for installasjon og eventuell utskifting ved skade som skuldast aktløyse.

Ved utskifting av privat eigde vassmålalar, tek kommunen kostnaden ved utskifting, og vassmålaleige blir fakturert frå dato for utskifting.

Pris for leige av vassmål kjem fram av gebyrregulativet. Dersom ein vassmål vert borte eller skadd, skal abonnenten omgåande melde dette til kommunen. Kommunen tek atterhald om retten til å krevje full erstatning for tap eller skade.

§ 4-4. *Avlesing av vassmål*

Abonnenten skal lese av vassmålaren så nær fastsett tidspunkt for avrekning som mogleg og sende resultatet til kommunen innan fastsett frist. Tidspunkt for avlesing vert fastsett i SMS (alternativt avlesingskort) frå kommunen.

Unnlåt abonnenten å lese av vassmålaren kan kommunen etter purring fastsetje årsgebyret etter skjøn.

Dersom abonnenten unnlèt å foreta avlesing kan kommunen sjølv setje i verk avlesing utan ytterlegare varsel til abonnenten og krevje særskild betaling for å dekkje kommunens kostnader med dette. Satsen for betaling kjem fram av gebyrregulativet.

[§ 4-4](#), første og andre ledd gjeld ikkje abonnentar med fjernavlesing av vassmålår.

§ 4-5. Tilsyn og vedlikehald

Abonnenten skal halde vassmålaren lett tilgjengeleg for avlesing, tilsyn og vedlikehald.

Abonnenten skal føre tilsyn med vassmålaren. Abonnenten er også ansvarleg for å følgje med på forbruksutviklinga, slik at lekkasjar eller feil vert oppdaga snarast mogleg. Vert ein vassmålår skadd eller går tapt, skal abonnenten straks melde frå til kommunen. Broten plombering av vassmålaren vert også rekna som skade.

Kommunen kan føre tilsyn med vassmålaren. Kontrollør frå kommunen skal legitimere seg utan oppmoding.

§ 4-6. Avrekning ved feilmåling

Dersom vassmålaren ved kontroll viser meir enn 5 % for høgt forbruk, har abonnenten krav på tilbakebetaling av for mykje betalt årsgebyr som følgje av feilmålinga. Er plomberinga broten, har abonnenten ikkje krav på tilbakebetaling.

Tilbakebetalinga vert rekna frå det tidspunkt ein legg til grunn at feilen må ha oppstått.

Krav som er forelda etter [foreldelsesloven](#), vert ikkje dekt.

Viser vassmålaren meir enn 5 % for lågt forbruk, har kommunen krav på tilleggsbetaling etter tilsvarande reglar.

§ 4-7. Nøyaktigheitskontroll

Både kommunen og abonnenten kan krevje nøyaktigheitskontroll av vassmålaren.

Dersom kontrollresultatet ligg utanfor feilmarginen etter [§ 4-6](#), vert det utført ei justering, eventuelt utskifting av vassmålaren, utan utgifter for abonnenten. Dersom abonnenten har kravd nøyaktigheitskontroll og det ikkje vert påvist feil utanfor feilmargin, vert kostnadane betalt av abonnenten.

§ 4-8. Utskifting og flytting

Er målenøyaktigheita for dårleg, bestemmer kommunen om vassmålaren skal verte justert eller utskifta. Når vanleg levetid for ein vassmålår er nådd, kan kommunen bestemme at vassmålaren heilt eller delvis skal skiftast ut.

Kommunen kan krevje flytting av vassmålar som er plassert i strid med kommunen sine krav til plassering. Abonnenten kostar på slik flytting.

Kapittel 5. Innbetaling av årsgebyr

§ 5-1.*Innbetaling*

Forfalle krav på årsgebyr er sikra med pant i eigedomen etter [panteloven § 6-1](#). Gebyra kan verte kravd inn av kommunen etter reglar for innkrevjing av skatt.

Abonnementsgebyr og forbruksgebyr vert innkravd på felles faktura.

Forbruksgebyret vert betalt à konto basert på rapportert forbruk. Avrekning skjer på første termin (faktura) etter avlesing av vassmålaren.

Når ein abonnent får installert vassmålar gjeld reglane for stipulert forbruk frem til dato for installasjon av målaren forutsett at denne er godkjend av kommunen etter reglane i [§ 4-2](#).

Faktura vert sendt til abonnent.

Årsgebyra vert kravd inn over eit tal terminar som vert fastsett av kommunestyret.

§ 5-2.*Manglande innbetaling*

Dersom årsgebyret ikkje er betalt innan ein månad etter at den gebyrpliktige har motteke andre gongs varsling om innbetaling, kan kommunen stengje den kommunale vassforsyninga til eigedomen så framt kommunelegen ikkje motset seg avstenginga.

Kommunen kan krevje betaling frå abonnent for å dekke kostnadene i samband med stenging og påsetjing av vassforsyninga. Satsen for betaling kjem fram av gebyrregulativet.

Kapittel 6. Avsluttande bestemmingar

§ 6-1.*Klage og omgjering*

Det er ikkje høve til å klage på gebyr som er fastsett i kommunen sitt gebyrregulativ, jamfør [forvaltningslovens](#) føresegner.

Einskilde vedtak gjort i medhald av denne forskrifta, kan klagast til særskild klagenemnd, jamfør [forvaltningsloven § 28](#), andre ledd.

Gebyr må betalast innan forfallsdato sjølv om gebyrvedtaket er klaga inn.

§ 6-2. Ikraftsettjing

Forskrifta trer i kraft 1. november 2025.

Frå same tid vert tidlegare forskrifter om vass- og avløpsgebyr i Bygland kommune oppheva.